



Vin grischun

La producziun e la vendita da vin grischun ei reglada el cataster da vegnas dil Grischun. Quel definescha, en tgei territoris ch'ei astga vegnir plantau tgeininas iuas per la producziun da vin commerziala. In ulteriur criteri ei da mo plantar vegnas sut in'altezia da 600 meters sur mar.

La sort principala dil Grischun ei il Pinot Noir. Tenor l'organisaziun da branscha «Graubünden Wein» ein varga 90% da tut las iuas per producir vin tgierschens da quella sort. Cunzun ils vins dil Segneradi gauda ina buna reputaziun ell'entira Svizra. La producziun annuala da vin grischun munta a circa 2,5 milliuns liters vin. (fmr/sb)

Lavur manuala ei dumandada. Voluntaris da Sagogn sustegnan il project dad Aron Candrian (davostier sin la foto).

FOTOS SANDRO BUCHLI

Dar veta al pli vegl vin dil Grischun

Culla producziun da vin han ils Candrians da Sagogn rimnau bia experientschas el decuors dil davos decenni. Onn per onn produceschan els ussa rodund 500 butteglas vin alv da lur vegna a Survilada. Il Plantahof mesira actualmein las temperaturas ed auters facturs per eventualmein dar ina lubientscha dad era vender il vin sursilvan. La FMR ha l'jamna vargada visitau la raccolta dalla vegna dil pli vegl vin grischun.

SANDRO BUCHLI/FMR

Dapi miez mars ei Hannes Candrian (76) da Sagogn bunamein mintgagi sila spunda sulegliva cul num Survilada per observar e tgiar cun premura las troclas dil vin da Sagogn. Ei detti adina lavur: «Emprem eis ei da tagliar anavos las iuas, in'otra ga eis ei da segar il pastg», di igl um che anflau sia gronda pissiun ella cultivaziun da vin a Sagogn: «Igl ei semplamein enzatgei che jeu fetsch feg bugen.»

Sin rodund 400 meters quadrat han el e siu fegl Aron Candrian dapi varga diesch onns plantau iuas dil tip «Solaris» per producir vin alv per agen diever. Solaris seigi ina sort ch'ei forsa buc aschi enconuschenta sco per exempel Chardonnay ni Completer. «Persuenter ei quella sort detg resistenta e drova buc aschi bia sulegl», declara il viticultur da professiun Aron Candrian, che lavura principalmesin sin sia vegna a Fläsch.

Cun agid dad ina pintga truppa da voluntaris e voluntarias ei la raccolta dil vendergis vargau spertamein stada sut tetg. Equipai cun forschs e sadialas, ein las troclas setschentadas enteifer biebeen treis uras en plirs harass sil car annex. Suenter ein las iuas veginidas transportadas ella pressa a Malans.

Forsa gleiti en vendita

La lavur seriusa dils Candrians vegn schazegiada, era da vart ufficiala. Cun in'apparatura speciala mesira il Plantahof, il center d'agricultura grischun, las temperaturas e l'irradiaziun dil sulegl a Survilada. «Sch'ei fuss avunda cauld e las cundiziuns constassen per plantar cheu la iua dalla sort Pinot Noir, lura savessan els dar la lubientscha a nus per vender il vin», di Aron Candrian. Quella licenza manca il mument aunc, ed aschia resta la vegna da Sagogn in hobi.

Il cataster viticol grischun ha numnadamein definiu las zonas da vin grischunas (mira box). Quellas ein el Segneradi, el Puschlav e Mesauc, els Tschun Vitgs, Cuera ed a Favugn. Il ca-



Las iuas da Survilada astgan crescher cun ina biala survesta sil vitg da Sagogn.



Hannes Candrian muossa cun plascher las iuas madiradas. Dapi la primavera eis el bunamein mintgagi staus ella vegna.



onns dus tochen treis grad pli cauld, lu sestauscha era il cunfin da far in bien vin», aschia Aron Candrian.

Tgei che sa esser d'avantatg per las iuas da Sagogn, ei ord vesta globala in grond problem. Liungas periodas cun temperaturas caudas senza plievgia fan greva la veta a biars purs da vin ell'Europa. «En Spagna per exempel cumpra in dils gronds ed enconuschents producents da vin adina dapli surfatscha el territori dils cuolms dallas Pireneas, perquei ch'igl ei vegniu memia cauld da producir vin el sid», di Aron Candrian che posseda sez era ina vegna el Priorat el vest da Barcelona.

500 tochen 600 butteglas

La raschun che Sagogn ei in territori adattau per producir vin ei denton buca mo ina consequenza dallas temperaturas pli aultas. In document historic digl uestg da Cuera Tello digl onn 765 cumprova ch'ei vegneva gia avon circa 1250 onns cultivau vin a Sagogn. Aschia ei Sagogn historicamein documentau il pli vegl territori da vin dil Grischun. Sin quei testament da Tello sereferescha era il num dil vin alv «resvegl», perquei che quella tradiziun ei ditg ida en embridonza e festivescha ussa in «resvegl» el clima migeivel dalla Foppa.

Dalla historia anavos ella vegna da Sagogn: Cullas iuas dad uonn vegnan ils Candrians a producir denter 500 e 600 butteglas vin alv biologic. «Entschiet havein nus cun 190 butteglas avon 11, 12 onns, ed ussa gartegi mintg'onn da far entuorn 500 butteglas», di Hannes Candrian. Ei seigi denton vinavon ina fatschenta che procuri per divers cuosts e pretendi bia lavur ed idealissem.

Cul di dalla raccolta eis el en mintga cass cuntents: «Igl ei in bien onn, nus vein giu mo paucas malsognas», explichescha el. Tochen che il resvegl survegn sia lubientscha ufficiala per la vendita e vegn renconuschius el cataster da vin, pudessi aunc ir in mument. Tochen lu resta il «resvegl» in hobi dils Candrians. «Nus vulein semplamein musar, tgei che va», resumescha Aron Candrian lur stentas.

taster excluda autras regiuns adattadas sco la Foppa. Culla midada dil clima erodeschan denton era las cundiziuns da far vin, aschia che regiuns pli aultas savessan profitar.

In fenomen global

Tenor igl Uffeci federal d'ambient ein ils indicaturs dalla midada dil clima en Svizra surpridents: Dapi igl onn 1961 ei il cunfin da nul grads seruschnaus per

300 tochen 400 meters. Las periodas da vegetaziun cuozzan ussa duas tochen treis jamnas pli ditg en Svizra. Quei ha era consequenzas per la branscha da vin: «Sch'ei vegn ella media ils proxims 20